

東林別傳



東林別傳



東林列傳卷二十三

江陰陳鼎定九輯門人

沈霽載陽

蔡世英偉人

全校

明

文震孟姚希孟列傳

文震孟字文起長洲人弱冠舉萬曆丙午賢書居父  
喪哀毀廬墓竹塢三年未嘗見齒有眞孝廉之目十

上春宮至天啟二年始成進士廷對第一授翰林院  
修撰時魏忠賢漸用事因禁講學與黨議正人以次  
竄逐震孟上疏言勤政講學之實謂君臣相對如家  
人父子則左右近習無緣可以蒙蔽且曰空人國以  
營私窟幾似濁流之投詈道學以逐名賢有甚僞學  
之禁疏上忤忠賢意乘上觀劇摘疏中傀儡登場語  
謂比上偶人激怒上傳杖八十輔臣救免降調未幾  
逆璫矯旨削籍崇禎改元復原官充日講纂修熹宗  
實錄校對光宗實錄副本請改定三案之誤其在講

筵嘗講君使臣以禮力勸帝培養士氣推心感人勿  
徒峻刑法以啟猜疑講罷卽傳旨釋刑部尚書喬允  
升副都御史易應昌於獄又講春秋宰咺歸罪言咺  
位六官之長而壞法亂紀自王朝始焉用彼相蓋有  
所諷也在春坊時疏劾呂純如羅織諸賢今籍輿援  
思借邊才起用吏部尚書王永光假竊威柄變亂祖  
制考選擯斥清才上命指實具奏永光旋罷歷陞詹  
事府少詹事上知可大用八年七月進禮部左侍郎  
兼東閣大學士旣與首輔溫體仁忤十一月遂罷初

震孟講春秋稱旨已而引疾不允體仁語之曰行相  
君矣何避也其相也值體仁在告出不意驟命之震  
孟自恃特簡於體仁無所依附始入體仁有票擬必  
請正有改必從震孟語人曰溫公虛懷乃爾何云奸  
同官何吾騶曰是人機械甚深何可信也越數日體  
仁知其疎凡震孟票擬徑抹去不用震孟拍案大呼  
以諸疏擲體仁體仁亦不顧至是震孟吾騶欲以工  
科給事許譽卿補南京太常卿體仁與吏部尚書謝  
陞難之陞遂疏糾譽卿震孟票擬奪俸體仁不可震

孟作色擲筆曰言官以去爲榮卽革職無害體仁遂揭此語入告與吾騶俱罷譽卿擊璫有直聲十年不調削籍以去而震孟清勁負時望入相僅三月體仁擠之不竟其用天下惜之十年卒於家福王南立謚

文肅

姚希孟字孟長吳縣人生數月而孤其母文氏徵明之曾孫女也希孟父歿文僅二十餘家故貧困於役希孟晬之日縣吏卒將之庭踞堂而嬉人皆憐之或以慰其母曰此兒吉徵也數歲穎悟異常幼卽能屬

文外祖父元發異之謂其子震孟及希孟此兩孺子  
皆不凡以故震孟與希孟舅甥如兄弟也希孟性至  
孝母課督之甚嚴甫成童而業大就與震孟俱爲春  
秋大師老生宿儒皆自謂勿及希孟師事張世偉而  
友周順昌朱陛宣震孟弱冠舉鄉試屢上禮部不第  
希孟久爲諸生年三十四始與世偉順昌陛宣同舉  
鄉試踰六年遂先震孟成進士執政將選爲庶吉士  
希孟初以親老辭請於母而後應時學士劉一燝韓  
爌爲教習師皆深器重之神光之際再值大喪一燝

與熿同時執政希孟左右其間一時名賢布滿朝列  
給事中楊漣論劾崔文昇侍疾無狀及力王移宮事  
皆希孟贊決之尋授翰林院檢討時漣以移宮事放  
歸與希孟慷慨言別矢禍福共之熊廷弼素與東林  
異而希孟深重其才於其被逮也出郊唁之慰勞良  
苦且爲白之公卿間其後閹黨借廷弼以誣諸人蓋  
自此始也天啟二年魏忠賢與客氏漸得志殺王安  
文震孟始登第卽以言事落職希孟所與遊及共講  
學者如鄒元標馮從吾王紀等先後去國廷臣以學

爲諱於是希孟亦奉母歸與震孟俱南居住來東林  
講學二年忠賢焰益熾巡撫周起元謂希孟曰賈彪  
云我不西行大禍不解公亦有意乎不得已仍奉母  
入都至則趙南星高攀龍楊漣左光斗魏大中等相  
繼併黜希孟入朝張儀且惴惴也居無何甫同考會  
試而母文氏以病卒於京邸希孟奉喪歸至中途逆  
璫矯首削籍抵家屏居墓廬絕葷血者三年朝夕哭  
聲震林木過者聞而悲之七年熹宗崩莊烈卽位誅  
忠賢逆黨稍斥而柄國者猶持同異希孟與震孟等

未卽登啟事高陽孫承宗貽書同邑閣臣李國楷乃  
召爲左春坊左贊善尋進右庶子與震孟俱爲日講  
官時韓爌復出爲首輔奉詔定逆案希孟助之爲多  
而楊漣左光斗周順昌魏大中等贈謚恩卹葬典備  
至凡政出自爌者皆希孟力也希孟在講筵四載歷  
陞詹事府正詹事兼侍讀學士帝亦重之時諮訪政  
治得失是時周延儒溫體仁方迭用事延儒頗善希  
孟欲引之而體仁深險忌希孟英果時思以事中焉  
會庚午順天府鄉試希孟與姚恭明爲考官誤取武

生三人武生例不當人闈然責在提調於考官無與也體仁欲歸咎希孟乃票旨命覆試武生而以文字苛繩之遂謫希孟以少詹事掌南翰林院希孟旣去猶時謫其講語於帝前懼帝復用之也蓋體仁之忤刻如此希孟至南京得疾請假歸歸二年而卒震孟入閣僅三月體仁亦以事逐之震孟歸而希孟病矣舅甥執手榻前依依靡間希孟卒甫十餘日而震孟亦卒

外史氏曰文起在朝席不及暖而卽被逐孟長入朝

未久亦卽被謫夫天未欲存明也故使其舅甥歷坎  
坷焉天欲存明豈肯使之遽亡哉

東林列傳

卷二十三

六

許士柔傳

許士柔字仲嘉常熟人幼聰慧父伯彥課授十三經  
孫吳握竒經諸書諷誦皆上口踰年卒業鄉黨父老  
皆驚異之萬曆末舉應天府鄉試天啟二年成進士  
選翰林院庶吉士四年授檢討持節冊封楚王以父  
喪去崇禎初服除陞侍講纂修神熹二朝實錄管理  
誥勅歷陞中允諭德後爲左庶子掌左春坊事先是  
熹宗時魏忠賢擅政群小持門戶異同嗾忠賢命諸  
史臣輯三朝要典辯挺擊紅丸移宮三案伸邪說毀

正論復改修光宗實錄削其與要典牴牾者莊烈初  
元用中允倪元璐言燬要典而所改光宗實錄如故  
少詹事文震孟疏抉摘之是時溫體仁當國與王應  
熊皆附會邪議者意難之震孟疏入錢士升爲次輔  
擬諭禮部詳核同異帝御平臺手出震孟疏辯明三  
案是非帝力闢要典邪說體仁懼其改實錄也陰沮  
之曰事久經聖諭申飭便可垂示萬古於是奉是非  
已明不必議改之旨應熊所擬也士柔憤然曰若是  
則要典猶弗焚矣乃上疏曰臣備員纂修恭閱皇考

實錄總記於世系獨畧皇上娠教之年聖誕之日不  
書也命名之典潛邸之號不書也聖母出何氏族受  
何封號不書也此皆原錄備載而改錄故削之者也  
原錄之成在皇上潛邸之日猶詳慎如彼新錄之進  
在皇上御極之初何以率畧如此夫臣同官震孟所  
言是改錄所筆者也筆焉而不信天下萬世猶得按  
其說而正之若臣所言是改錄所削者也削焉而不  
書是使聖朝父子母后兄弟之大倫皆闇而不明缺  
而莫考其於信史謂何疏上得旨謂累朝舊例不必